

上清迴神飛霄登空招五星上法經

迴神飛霄登空招五星上法

迴神哺飲上招五星登空之道

上衝七玄 下解兆形 混合萬變 立昇玄綱

沐浴蘭香 入室清齋 修行其方 五內映明

七孔朗然 神鎮絳府 形登五晨 至極妙法

非真不傳 所謂知道者易 修方者難 難修之道

可不祕乎

常當以甲子 甲午 乙酉 乙卯 己丑 己未 戊辰 戊戌之

日 沐浴清齋入室 坐臥任意 臨目執手於心 彷彿存東方青帝

諱通明 字蓋卿 巾青巾 衣青衣 青冠青履 帶通光陽霞之章

入我身中 又思肝中四真 名青明君 字明輪童子 常鎮我肝中

守我胃管之戶 膏膜之下 固塞死氣 為我降青精月水玉芝 因存

歲星光精 口引咽之九十過止 令氣極充於肝府 行之九年 使東

方青腰玉女九人侍側

次思 南方赤帝 諱太陽 字幻林 巾赤巾 衣赤衣 赤冠赤

上清迴神飛霄登空招五星上法經

清微藏書閣

履 帶四朗朱碧之章 入兆身中 又思絳宮中一元丹皇君 名神運

珠 字子南丹 一名生上伯 一名史雲拘 常鎮我絳宮中 守我項

骨首之戶 斷絕死氣之路 為我降丹精赤水玉芝 因存熒惑星光精

口引嚥之八十過止 令赤氣充布絳宮中 行之九年 役使南方赤

圭玉女八人侍側

次思 西方白帝 諱通陰 字元起 巾白巾 衣素衣 素冠素

履 帶皓靈扶希之章 入兆身中 又思肺中六真 名上素君 字梁

南中童 恒鎮我肺中 守我十二關門 斷絕死氣之路 為我降素芝

月水玉精之丹 因存太白星精光 口引咽之六十過止 令星氣布充

於肺 行之九年 太素玉女六人侍側

次思 北方黑帝 諱通神 字子規 巾蒼巾 衣皂衣 蒼冠蒼

履 帶鬱真簫鳳之章 入兆身中 又思腎中七真君 名玄陽君 字

冥光先生 常鎮我兩腎中 守我背骨地戶 斷塞死氣之路 為我降

玄陰丹芝九液之水 因存北方辰星精光 口引咽之五十過止 令星

氣充布兩腎之中 行之九年 太玄玉女五人侍側

次思 中央黃帝 諱萬福 字太倉 巾黃巾 衣黃衣 黃冠黃

履帶中元八維玉門之章 入兆身中 又思脾中五真君 名養光君
字太昌子 常鎮我脾中 守我極根之戶 斷絕死氣之路 為我致
黃水月華玉胎丹芝 因存中央鎮星精光 口引咽之十二過止 令氣
充於脾中 行之九年 黃素玉女十二人侍側
次思上玄元父君 諱高同生 字左迴明 下元玄母 名叔火王
字右迴光 二神守我本命之根 塞我死氣之源 為我致陽芝陰精
哺飼我身 存日月二景之光 映照一形 口引光色三十六咽止
令光氣充盈臍下丹田宮 行之九年 面生金容 目有流光 役使六
甲 召制六丁 隨意所欲

真人詣房存思五帝二景真神事訖 祝曰

五星纏絡 光流內明 二景飛霞 灌溉五精

真神鎮藏 長保黃寧 太乙務猷 變胎迴嬰

肝肺結華 心腎光盈 脾保中元 五芝受生

日月寶光 與帝合并 飛空騰虛 上朝玉清

修行迴神哺飼招五星飛空 事畢於此 行之九年 存祝不虧

真靈內映 三元詣房 絕死氣於九房 度生錄於南宮 承五神之玄

上清迴神飛霄登空招五星上法經

清微藏書閣

注 咽二景以長存 五藏結華而不朽 魂魄保鎮而停年

鎮神養生內思飛仙上法

太微天帝君鎮神內思解胞散結固魂凝魄混化玄真之道

開通六府 五官受靈 咽氣思真 芳芝自生

胃管結絡 神澄體清 玉輦立至 白日登晨

常當清齋沐浴 燒香入室 夷心棄累遺塵 豁然無滯 注念不

眠 然後真形可睹 遊神可還 每以平旦東向平坐 臨目內存形色

朗然 呼其正諱還鎮本宮 叩齒三十六通 乃存髮神名蒼華 字太

元 形長二寸一分 腦神名精根 字泥丸 形長一寸一分 眼神名

明上 字英玄 形長三寸 鼻神名玉隴 字靈堅 形長二寸五分

耳神名空閑 字幽田 形長三寸一分 舌神名通命 字正輪 形長

七寸 齒神名崿鋒 字羅千 形長一寸五分 面部七神 同衣飛羅

裙 並嬰兒之形 存之審正 羅列一面 各鎮其宮 畢 便叩齒二

十四通 咽氣十二過 咒曰

靈源散氣 結氣成神 分別前後 總統泥丸

上下相扶 七神敷陳 流形遁變 愛養華元

導引八靈 上衝洞門 衛軀攝景 上昇帝晨
畢 次思心神名丹元 字守靈 形長九寸 肺神名皓華 字虛
成 長八寸 肝神名龍煙 字合蒼明 長七寸 腎神名玄冥 字育
嬰 長三寸六分 脾神名常在 字魂庭 長七寸三分 膽神名龍曜
字威明 長三寸六分 六府真神 同著丹錦飛裙 處五臟之內
六府之宮 形若嬰兒 色如華童 存之審正 羅列之形 從朝至暮
思念勿忘 叩齒二十四通 咽氣十二過 祝曰
五臟六腑 真神同歸 總御絳宮 上下相隨
金房赤子 對處四扉 幽房玄闕 神堂紐機
混化生神 真氣精微 保鍊丹田 與日齊暉
得與八景 合形昇飛
畢 次思精血三真 名元生君 字黃寧子 恆鎮我兩孔之下源
骨節二真 名堅玉君 字凝羽珠 鎮我太倉之府五腸之口 心中
一真 名天精津液君 字飛生上英 鎮我胸中四極之口 九元之真
男 名拘制 字三陽 鎮我左耳伏晨之戶 皇一之魂女 名上歸
字帝子 鎮我右耳伏晨之戶 紫素左元君 名翳鬱無刃 字安來上

上清迴神飛霄登空招五星上法經

清微藏書閣

鎮我頭面之境 黃素中無君 名圓華黃刃 字太張上 鎮我胸腹
之境 白素右元君 名啟明蕭刃 字金門上 鎮我下關之境 日中
司命 名接生 鎮我左手中 月中桃君 名方盈 鎮我右手 胎中
一元白氣君 名務玄子 字育尚生 太一精魂 名玄歸子 字盛昌
二神鎮我五臟之上結 結喉之本 結中青氣君 名案延昌 字合
和嬰 元君精魂 名保谷童 字明夫 二神鎮我五臟之下 大胃之
上 節中黑氣君 名斌來生 字精上門 帝真精魂 名幽臺生 字
灌上生 二神鎮我九腸之口 伏源之下 胞中黃氣君 名祖明車
字神無極 天帝精魂 名理維藏 字法珠 二神鎮我少腹之內 二
孔之本 血中赤氣君 名混離子 字叔保堅 司命精魂 名發紐子
字慶玄 二神鎮我百關之血絕節之下 上玄元父君 名高同生
字左迴明 下元玄母 名叔火王 字右迴光 帝皇太一 名重冥空
字幽寥無 九帝尊 名曰明真 字眾帝生 太帝精魂 名右陽堂
玉 字八靈 九關魂 名綠迴道 字絕冥 天紀帝魂 名照無阿
字廣神 七神鎮我本命之根 塞我死路之門 存祝眾真從頭至臍
無不朗然 便使金液流匝 玉華映魂 神宸溢於窮腸 帝氣充於九

關 七祖披釋於三徒 受更胎於南宮 鎮生神於一身 布真氣以固
年

畢 叩齒三十九通 祝曰

氣生於無 結氣於神 陽氣外貞 陰氣內成

二象番錯 交結元靈 內真鎮衛 九孔受生

保魂固魄 萬神安停 保我三關 華芝充盈

與我同昇 俱造玉清

畢 咽氣三十九過 以鎮三十九戶 氣澤匝潤流布一身 若能

棄累 不拘世塵 靜心夷意 朗睹虛房 眇想內視 鎮神固魂 絕

死氣於九戶 鎮生宮於上關 迴匝存祝 如面共言 晝夜三年 真

神見形 皓華反根 朽齒牙生 五藏結絡 內補充盈 役召六甲

驅策六丁 室致九霄之賓 神降三素之輶 神飛形舉 白日登晨

右 上真之神寶名內字 而鎮在人身之內 運於九天之氣 固人

六府機關 萬精化生 皆由於神 神鎮則生 神逝則亡 勤心積感

則能舉人身形 上昇玄宮 求仙之道 不知形神內名 又不知填

塞死戶 生豈可冀乎 夫修此道 不得身履殄穢 食五辛酒肉之屬

上清迴神飛霄登空招五星上法經

清微藏書閣

觸忤正氣 神則去矣 人知豐肴以甘口 爵祿以榮身 而不願甘

口之食 是傷命之斧 爵祿奢麗 是消真之源 故神人愛幽寂 不

棲身 不顯形於凡塵者也 修生之家 宜可慎乎

上清迴神飛霄登空招五星上法經竟

天運壬辰年辰月正一天師清微弟子洪鼎堅羅大英恭錄彙編